



DECLARATION
DES EGLISES RE
FORMEES DE FRANCE
& Souueraineté de Bearn.

*De l'iniuste persecution qui leur est faicte par les
ennemis de l'Estat & de leur Religion. Et
de leur legitime & necessaire defense.*

NOUS Deputez en l'Assemblée Generale
des Eglises Reformées de France & Sou-
ueraineté de Bearn persecutées par les en-
nemis de l'estat & de leur religion qui abu-
sent des affections & de la conscience du Roy, voyans
qu'à nostre grand regret nous sommes constrains par la
violence de l'opression de recourir aux moyens naturels
& legitimes, pour conseruer, par vne necessaire defense
la liberté de nos consciences, & la seureté de nos vies
protestons au nom desdictes Eglises deuant Dieu & les
hommes, de demeurer inuiolablement sous la tres-hu-
ilection & obeissance de nostre Roy, recognoissans qu'il
nous à esté donné de Dieu pour nostre Souuerain Sei-
gneur. Et à fin que tout le monde puisse recognoistre que
comme cette obeissance est, apres le seruice de Dieu le
seul but de nos intentions assez declarées par toutes les
actions passées de nostre fidelité grauées aux colonnes
A ij

de cet Estat & aux couronnes de nos derniers Roys relenées par nos peres & nous de deffous le efforts des factions ennemies : aussi la haine & la persecution que nous souffrons maintenant n'est pour autre cause excitée par nos ennemis, que pour ceste affection veritable & sainte, à laquelle ils nous recognoissent inseparablement attachez par les enseignemens de nostre Religion l'exemple de nos peres, & les interets de nostre propre conseruation. Nous supplions donc premierement le Roy, & tout ce qu'il y a de bons François, puis tous les Roys, Princes & Potentats, amis alliez de la Couronne, & generalement toutes personnes touchees de zele à la gloire de Dieu, de compassion de l'innocence soulee, & de desplaisir des miseres qui menacent aujourd'huy la France: d'entendre icy nos iustes plainctes, pour voir en icelles la perfidie & cruauté de ceux qui malgré nous les arrachent de nostre sein, & nous obligent de les publier pour la iustification de nostre innocence, & pour enseigner à tous ceux qui aiment la iustice & la verité, que le refuge de la defense à laquelle nous sommes reduits est necessaire & iuste; nos ennemis n'estans poussez d'autre mouuement à mettre le feu dans ce Royaume, que pour esteindre nostre Religion, & pour abbatre la resistance la plus ferme qui se peut opposer dans l'Estat aux entreprises estrangeres. Mais d'autant que par leurs artifices accoustumez, ils ont icy suiuy la route ordinaire à la violence & cruauté qui a de coustume de se faire voye par la calomnie à l'oppression d'une iuste cause. Et pour pretexte de nous courir sus, ils nous ont publiez rebelles & seditieux, employans, pour espandre par tout cette accusation, les Edits & Declarations du Roy & des Parlemens, & la bouche mesme des Ambassadeurs es pays estranges. A fin que la simplicité de ceux qui sont

moins informez ou de la haine, ou du pouuoir, ou des artifices de nos mal-veillans, ne recoiue quelque sinistre impression de nous touchant le deuoir d'obeissance & fidelité enuers nostre Roy & nostre patrie. Nous ferons voir icy que tous les pretextes, les crimes iniurieux qu'on nous impose, sont artifices & deguise mens empruntez pour seruir de voile aux outrages faicts à l'innocence. Ainsi que pour allumer la haine des Rois, & la fureur des peuples contre l'Euangile, on accusoit jadis les premiers Chrestiens, & nos peres en ces derniers siecles, de semblables crimes. Qu'ils contreuenoient aux Decrets de Cesar; esmouuoient sedition entre les peuples, heuroient la Royauté. Et sous ces accusations supposées on leur a fait souffrir par tout le monde la rigueur du glaive, l'ardeur des feux, la cruauté des massacres, la fureur des guerres, & l'horreur de toutes sortes de supplices. Il est vray que comme nos peres estoient plus espartz & descouverts ou exposez à vne plus facile boucherie, on a imputé directement ces crimes à la religion, & puis on leur a fait la guerre ouuertement pour la professiō qu'ils en faisoient. Auioird'huy par vn artifice accommodé à leurs desseins nos ennemis changent de methode. Ils déclarent la guerre aux personnes pour la faire à la religion. Et pource qu'apres tant de pefidies & de cruantez le bras de Dieu nous ayant releuez comme des cendres de nos peres & par vne miraculeuse prosperité du feu Roy, (conduit par nostre fidelité iusques sur le throsne de ceste Monarchie) les breches de l'Estat estās reparées afin d'y establir vne ferme paix, on nous a donné vn Edict pour la liberté de nos consciences, & des seuretez pour mettre à couuert nos biens & nos vies contre la violence que les maux passez nous faisoient craindre pour l'aduenir: ce seroit certes à present trop apparemment violer la paix, & se declarer trop visiblement ennemis

du repos de la France, si on reuoueroit ouuertement l'Edict fait en nostre faueur: si on nous declaroit la guerre pour nostre religion. Ce seroit aussi interesser trop de personne en vne meme cause, C'est pourquoy pour courir le dessein proietté de la ruine de cet Estat par la nostre, pour armer le Roy contre nous, & pour nous perdre avec plus de facilité qu'on ne croit autrement pouuoir faire, on nous a déclaré rebelles & criminels, on tasche de rédre ceste cause plus particuliere, on appelle la guerre qu'on nous fait vn chastiment de seditieux. Mais quand nous aurons exposé icy aux yeux de tout le monde le dessein de ceux qui sont auteurs de ces troubles & confusions: la lógue oppression que nous auons soufferte iusques icy en toute patience: l'euidence de nostre justice au procedé que nous auons tenu enuers nostre Roy en nos plainctes & tres-humbles requestes, qu'on nous impute maintenant à crime. Et finalement la persecution ouuerte qui nous est faite à present par la voye des armes, & leuées contre nous en tous les lieux de ce Royaume, où on estime que nous pouuons faire quelque resistance, Nous esperons que nous mettrons nostre innocence à couuert de ces calomnies, rendrons approuuée la iuste & necessaire defense à laquelle nous auons recours en l'attente du secours & benedictio du Tout-puissant. Et nous acquerons la faueur & l'assistance de tous ceux qui aiment la gloire & la verité: & l'ayde & le support de quiconque desire la conseruation & le salut de ce pauvre Royaume.

Depuis que le plus ferme appuy de l'Edict de nostre seureté, estably par la main du feu Roy, tomba par le coup de sa mort, les ennemis de nostre Religion, & de la paix publique s'esleuans avec plus d'esperance de progrez & de succez en leurs desseins, couuerirent tous

leurs efforts à jetter par terre ce fondemēt de la trāquillité de l'Estat. Scachans que le plus assēuré moyen de ramener la confusion des troubles & des guerres passées estoit de destruire l'Edict qui les auoit destruittes. Mais ne se pouuans promettre que les bonnes inclinations du Roy & la sagesse de la Royde sa Mere, lors regente, & tout ce qu'il y a de bons François interessez en la paix du Royaume, consentissent ou peussēt souffrir vne rupture ouuerte de l'Edict; ils ont cherché de gagner en derail ce qu'ils ne pouuoient obtenir en gros. Et par artifices & moyens plus couuerts faire tomber les choses dans le precipice auquel ils les ont auourd'huiettées.

Le premier fondement de leur dessein se recogneur avec estonnement & iuste apprehension de tous les nobles, quand au sacre du Roy on luy fit iurer ce sermēt. *Je rascheray à mon pouuoir en bonne foy chasser de ma iurisdiction & terres de ma subiection tous heretiques denoncez par l'Eglise.* Comme s'il prenoit sa Couronne sous cette condition & sous cette loy qu'il nous exterminerait quand il le pourroit faire. Le sang du Grād Henry crioit encore vengeance du furieux & abominable parricide qui protesta & afferma n'auoir esté induit par autre raison à le tuer, que pource qu'il estoit fauteur d'heretiques, qu'il les souffroit en son Royaume, qu'il ne leur faisoit pas la guerre: Et voila qu'on fait promettre à son fils, à son successeur, qui employera toute sa puissance à les exterminer. Puissante & efficaceuse raison pour imprimer au cœur d'un Roi, des ses plus tendres ans, la necessité de nous hair & de nous destruire, que d'adjoûster à la terreur de l'exemple du pere cruellemēt meurtri pour auoir maintenu la paix à ceux qu'on appelle heretiques, la stipulatiō de regner & seoir sur le thros-

ne apres lui à la charge de persecuter ceux qu'il auoit
conferuez. Car qui ne sçait que sous le nom d'hereti-
ques ils ne veulent entendre que nous ! Que nous som-
mes denoncez & qualifiez tels par l'Eglise Romaine.
Et partant si le Roi s'est deu croire obligé à l'observa-
tion de ce serment selon leur intention, que n'auons
nous deu craindre dès lors ? Pourquoi sur l'experience
du passé n'auons nous deu apprehender derechef les
mal'heurs senglans que telles impressions & necessitez
imposées aux consciences des Rois nous ont fait es-
prouuer ? Ce mesme dessein de nos ennemis se mani-
festa encore ouuertement, quand pour faire passer en
loy d'estat, & en maxime vniuerselle de conscience
qu'il ne nous falloit plus souffrir en France, ils obtin-
drent aux Estats derniers tenus à Paris, que les Cham-
bres du Clergé & de la noblesse demandassent expres-
sement par leurs cahiers l'execution de ce serment du
Roy, & la reception & publication du Concile de Tré-
te. Concile auparauant reietté en pleins Estats tenus
aux plus sanglans & violens troubles qui aient esté ex-
citez contre nous dans ce Royaume. Concile qui ne
souffre pas que les Rois régnerent s'ils donnent vie &
liberté en leur domination à ceux qu'il à declarez he-
retiques.

Mais le plus apparent & le plus sensible progrez du
dessein de nos mal-veillans s'est aduancé principale-
ment par les Sermons seditieux des Prescheurs Iesuite
& autres Moines, qui depuis quelques ans par vne li-
cence effrenée, & vne manifeste coniuration, se per-
mettant contre le respect des Edicts & leur auctorité
de prendre à tasche de les suggiller en leur chaires &
les rendre odieux, preschans la fureur & la sedition
nourissent le peuple à nostre haine, l'instruisent à nous
auoir en execratiō, & lui soufflans la guerre & le meurtre

re dans l'esprit, le disposent & rendēt preparé à toutes
 occasions de nous mal-faire. D'ou nous ressentons cō-
 tinuellement tant d'infractions des Edicts de paix, tant
 de bresches qui sont faictes à nostre seureté, tant de
 violences à nostre liberté. Neantmoins nous pourriōs
 dire encore iusques là, que nostre patience auroit sur-
 monté & comme estouffé la pluspart de ces maux, ou
 du moins esperé que les remedes enfin nous en auroiēt
 esté donnez de la bonté du Roy, & de la sagesse de ses
 plus fideles Conseillers, si les Iesuites ne fussent iamais
 montez au comble ou ils sont paruenus. Car comme
 il est notoire que par toutes sortes de moyens violens,
 ils ont procuré iusques icy l'extirpation de nostre Re-
 ligiō, & la ruine de ceste Monarchie. Depuis que leur
 pouuoir est accru à l'egal de leur mauuaise volonté,
 & qu'ils voyent tous obstacles, cy-deuant opposez à
 ce qu'ils osoient entreprendre, maintenant abbatus
 ou ceder dessous leur puissance, qu'elle autre attente
 nous à esté reseruee que d'experimenter le danger ou
 de si long temps ils proieettoient de nous precipiter? La
 face miserable de la Chrestienté aujourd'huy presque
 toute déchirée de guerres & de confusions horribles
 represente assez aux yeux de tout le monde quelle puis-
 sance ont eu leurs inductions artificieuses & meschan-
 tes à exciter vne guerre de Religiō tantost vniuerselle.
 Et qui peut presumer que la France (à laquelle ils ont
 desia tant de fois fait ressentir de si funestes playes de
 leurs mains meurtrieres) estant aujourd'huy liurée en-
 tre leurs mains, & comme leur gouuernement absolu,
 peut seule euitier l'accident commun qu'ils ont fait tō-
 ber sur les autres Estats ou leur credit & la diuersité de
 Religion leur ont donné pretexte & matiere de met-
 tre le trouble. Il n'y a eu personne si peu instruite en
 leurs desseins qui n'ayt cy deuant preueu ou predit le

misere & ruine de la France, deuoir arriuer lors que les Confesss des Iesuites y auroient le dessus. Et maintenant que d'un costé on les void en ce haut credit, & d'autre costé la France reduitte aux mal'heurs d'une guerre civile: y auroit-il quelqu'un si aueuglé qui n'y recogneuist l'œuvre de leurs mains? qui en voulut chercher vne autre cause, ou vn autre origine? La crainte de tomber en ces maux nous à fait ouir plusieurs aduertissemens des plus sages & mieux affectionnez François qui sy sont long temps opposez de toute leur puissance. La vertu du Parlement de Paris à plusieurs fois oppose son auctorité à leurs entreprises. Et les enseignemens remarquables, que son iugement respendit par toute la France, peu apres la mort du feu Roy, du danger & des pernicieuses consequences à l'Estat s'ils empietoient vn plus grand credit, guiderent la sagesse de la Royne Mere du Roy, pour ne laisser prendre plus de pied à leur audace dans la Cour & au maniement des affaires. Ce qu'ils n'ont iamais peu durant sa regence, & l'auctorité qu'elle a eu en la conduicte de l'Estat.

Pouuoir
des Iesui-
tes au
gouuernement
de France.

Mais comme tous changemens sont propres à ceux qui cherchent occasion de progresz, ayans rencontré au gouuernement suivant yn plus favorable support, comme ils sont accords à debiter l'utilité de leur mynistere, aydez del'occasion, & soustenus par cette main, se sont esleuez sur le pinacle du pouuoir ou nous le voyons estre montez. On vid lors le Iesuite le plus audacieux qui soit en toute la Societé introduict dans le Louure. Et d'une remeité sans exemple se placer dans le logis de la sacré personne du Roy, à fin d'auoir toutes les heures & les mométs de le gouverner en sa puissance. Et de là en auant à paru au gouuernement de l'Estat, quel pouuoir ont pris les Iesuites dessus les volontés du Roy. Par deux remarquables coups-deffay

aussi tost apres l'introduction de ce Iesuite, on peust
 recognoistre que desormais rien ne seroit impossible à
 ceux de la société de tout ce qu'ils voudroyent entre-
 prendre, pour eux, ou contre nous. La necessité de ce
 discours requiert que nous le representations:

Toute la Frâce se peut souuenir que trois iours apres
 que ce Iesuite eut l'oreille du Roy, ils firent casser dās
 son Conseil l'Arrest du Parlement, par lequel l'ouuer-
 ture de leur College dans Paris leur estoit interdite, ius-
 qu'à ce qu'ils eussent ouuertement renoncé aux maxi-
 mes de la ruine des Estats & du meurtre des Rois. Et
 pour monstrier que toute opposition à leur violence se-
 roit desormais vaine, firent par vn Arrest du Conseil
 (par eux affiché à tous les carrefours de Paris en signe
 de triomphe) casser les decrets de l'vniuersité qui leur
 auroit voulu faire quelque resistance. De mesme faci-
 lité & en mesme temps ils firent donner l'Arrest en fa-
 ueur des Euesques de Bearn le 25. de Iuin 1617. pour la
 main leuée des biens Ecclesiastiques du pays affectez,
 par establisement solennel arreste par le Souuerain &
 les Estats, à l'entretien de nos Pasteurs, College, Gar-
 nisons, officiers & autres charges dudict pays. Quinze
 ans durant les Euesques auoient faict cette poursuite
 avec toute sorte d'instance. Le feu Roy sollicité de Ro-
 me à diuerses fois en leur faueur, scachant les conse-
 quences d'un tel changement, obligé aussi par son ser-
 ment propre à ne rien innouer (outre la liberté de l'ex-
 ercice donnée aux Catholiques Romains, & la restitu-
 tion d'autant de biens Ecclesiastiques qu'il leur estoit
 necessaire accordé par Edit & executée dez l'an 1699.)
 les en auoit tousiours refusez. La Royné Mere du Roy
 pour semblables considerations & pour l'obligation de
 pareil serment iuré par sa M. à present regnante pour
 l'entretien de l'establisement ancien (confirmé d'ail-

leurs par douze patentes & Declarations obtenues contre l'instance que les Euesques faisoient du contraire) ny voulut point toucher. Le dessein de nos ennemis ne pouuoit receuoir plus d'auancement que par vn coup de cette nature. Car ils scauoient que l'execution de cetemain-leuée ettrainneroit (comme hélas ! il est arriué) la subuersion du pays, & la ruine de nostre religion en iceluy, avec esperance que du feu qu'ils y allumeroient ils embraseroient toute la France. C'est pourquoy ils engagerent le roy par sa conscience, & par la leçon de son serment touchant l'extirpation de la religion contraire à que bon luy semble. Il s'est establi pour conseil de la conscience du roy comme il parle. Et en ce conseil peut-il proposer autres maximes que celles de Rome ? qui toutes se peuuent reduire à ce sommaire de la subuersion de cet Estat & de nostre ruine, Luy donne pour loy la decision du Concile de Constance. *Qu'on ne doit point garder la foy aux Heretiques.* Que quelques Edits qu'il ait faits ou iurez ne l'obligent point. Que partant il peut ains qu'il les doit rompre. Ou pour l'induire il ne luy repete autre leçon que celle du serment de son sacre. Ne luy propose vn plus grand merite pour le loyer du Paradis que l'extirpation des heretiques. L'incite à rechercher par la vn renom plus glorieux que celui de S. Loys pour auoir fait la uerre aux infideles. Tels & semblables sont les Conseils de conscience de ce Iesuiste. Ausquels sa Majesté, postposant toutes autres considerations de son Estat, s'est laissée persuader, & a dit souuent, *Qu'il vaut mieux perdre son Estat que son ame.* Comme enseignée à tenir pour maxime qu'il y a des accessions de sauuer son ame en perdant son Estat. Or de la possession des volontés du Roi encloses de cette sorte en la main des Iesuites, ils ont entraîné à eux par vne suite

nécessaire tout le gouvernement de l'Estat. Ce qu'ils ont obtenu avec tant de facilité que tous les sages & anciens Conseillers & Ministres qui ont fidelement serui le feu Roy & la France, à establir & maintenir la prosperité & grandeur ou elle s'est veüe esleuée sous son regne, estans maintenant comme nous voyons reculez de tout maniement des affaires : ceux à qui l'abondante faueur du Roy donne toute l'auctorité au gouvernement : consentent volontairement que la conduite du conseil soit entre les mains des suppost de Rome, Cardinaux & Euesques. Et ceux qui y sont demeurez ou qu'on y a introduict de nouveau, les vns nourris du leuain des vieilles factions & affections d'Espagne, les autres gagez par les auantages des liberalitez de celle-ci, ou des honneurs de Rome (dont les Iesuites sont principaux banquiers) concourent tous en vn mesme consentement où il y va de la destruction de tout ce que le feu Roi auoit establi, mais principalement en ce qui nous concerne. Et ces allechemens ont eu tant de force, que tel de qui les meilleurs auoient attendu vne inuariable vertu à l'affection de la paix, & des bonnes maximes, par l'esperance d'une grandeur Ecclesiastique s'est deuoué pour instrument de la premiere breche par laquelle la persecution à couru sur nous. D'autre costé les Cours souueraines & subalternes, & toutes les Magistratures du Royaume sont remplies de personnes qui leur sont asseruies, ou par superstition, ou par interest de fortune. Les peuples ne suivent autres mouuemens que ceux ou ils les portent par leur predications, ou par leurs confessions secretes.

Telle estant donc la puissance de nos ennemis nous en auons aussi, à nostre domage, resenti les effects per vn traitement tout contraire à celuy que nous auions dessous le feu Roy. Car depuis qu'ils ont cette anctorité

*Les mau
uais trai
temens q
nous font
faus.*

(nous pourrions dire depuis leur regne) il ny à plus de faueur ni d'accez à la Court pour ceux de nostre Religion. Plusieurs à qui les seruices de leurs peres & les leur auoient conserué iusques là l'honneur de quelque charge pres du Roy, s'en sont veus reculez. La plus part sont obligez à s'en defaire sous ce commandement. *Changez de Religion ou quittez vostre charge.* On leur dit que le Roy ne peut voir de bon œil les Huguenots aupres de sa personne. Nous auons dans le Conseil nos plus animées parties pour iuges, & ennemis iurez ceux que nous allons supplier. Nous sommes exclus d'entrer aux charges dans toutes les Cours Souueraines ou subalternes contre la liberté des Edicts. Si quelqu'un de ceux qui en sôt ja pourueus se rangēt à nostre Religion, les Procureurs generaux ou leurs substitués s'opposent à sa seance. Les Chambres lui contestent & les repoussent. Et combien y en a-il en la Cour de Parlement de Paris & ailleurs, qui sont retenus de venir à nous par l'oppression de cette liberté? Mais quand aurions nous raconté toutes les sortes d'iniures qui nous sont faictes? Les insolences seditieuses qui se commettent iournellemēt pour empescher l'exercice libre de nostre Religiõ es lieux où il nous est permis. Les attentats & entreprises contre les places qui nous ont esté baillées en garde pour nostre seureté. Les pratiques secretes pour desbaucher les Gouverneurs d'icelles, comme il est arriué de nouueau es personnes des gouverneurs de Clermōt de Lodeuē & d'Argenton. La restitution de ces places à laquelle on nous refuse de pouruoir. Les excez & outrage que souffrent es villes & aux champs ceux de nostre Religion par la fureur du peuple excité par ses Predicateurs. Les rauages & bruslemens de nos temples & cimetieres. Les inhumanitez excès au detterrement de nos morts, ou pour leurs empescher la sepulture. Les violences faictes aux

conscience des malades, mesme en l'agonie de la mort
 pour les contraindre de renoncer à leur religion. La
 cruauté exercée contre les pauvres & malades qu'on ie-
 te hors des hospitaux. La force pratiquée en l'enleue-
 ment de nos enfans pour les nourir en la religion Ro-
 maine contre l'intention de leurs peres & de leur derni-
 ère volonté. Bref toutes manieres de torts & de violen-
 ces nous sou faictes contre l'auctorité du Roy, repos &
 tranquillité publique. En tous ces maux nostre seul re-
 cours est en nos plaintes, que nous adressons continuel-
 lement aux Magistrats, ou dans les Prouinces, ou dans
 les Cours Souueraines. Mais c'est hélas! ou au lieu de
 remedes nous trouuons le poison. Car non seulement
 nous sommes renuoyez sans obtenir droict sur nos re-
 questes: mais l'iniustice de laquelle ils aggrauent l'in-
 iure precedente, augmente l'audace de ceux qui nous
 ont fait le mal, encouragez par l'impunité & par la loy
 qu'ils prennent del'exemple des iuges mesmes. Nostre
 dernier refuge est en la iustice du Roy & vers les Mini-
 stres de l'Estat, où comme pour l'insupportable traite-
 ment que nous receuons de tous endroits nous recou-
 rons ainsi qu'à nostre asyle: aussi est-ce d'où nos enne-
 mis font le plus violent effort de nous empescher l'ac-
 cès. Ils voyét que la protection du Roy nous tiendrait
 couverts contre toutes leurs iniures. Ils sçauent que la
 voye de nos plaintes, que la nature ouure à vn chacun,
 nous conduiroit sous l'abry de sa justice, où nostre re-
 pos & la tranquillité publique seroient conseruez. Pour
 ceste cause nous experimètons d'eux en cet endroit vne
 plus animeuse coniuration. Car non seulement ils bou-
 chent l'oreille de sa Majesté & nous ferment toute en-
 trée vers elle, mais lors que nous y voulons aller par nos
 tres-humbles supplicatios & requestes ils nous tendent,
 par vne fraude plus que diabolique, le laqs de leur calō-

Procédé
 tenu par
 nous en
 nos plain-
 tes qu'on
 nous impu-
 te aujour-
 d'huy à
 crime.

nie pour nous faire tomber au blâme d'une prétendue
 rebellion & desobeissance. Ils chagent nos plaintes en
 crimes, ils nous appellēt seditieux & rebelles. C'est l'ac-
 cusation pour laquelle ils nous poursuivent criminellement.
 C'est l'accusation pour laquelle ils nous persecutēt aujour-
 d'hui. Nous appellons icel Ciel & la terre à
 tesmoin entre nos ennemis & nous, desirans que la
 procedure de nos plaintes enuers sa Majesté, que nous
 exposerons ici veritablement & au long, estant reco-
 gnuë de tous, on iuge de nostre innocence, & de la ca-
 lomnie de l'accusation, & finalement de l'iniuste guerre
 & persecution que nos haineux nous ont suscitée sous
 ce pretexte.

Afin d'entretenir l'Edict de paix & reparer les infracti-
 ons d'iceluy, le feu Roy voulut selon son equité establi-
 vn ordre au milieu de nous, par lequel nous pourrions
 de temps en temps sous sa permission & octroy nous
 assembler par Deputez de toutes ces Prouinces, pour luy
 presenter nos plaintes sur les griefs qui nous seroiēt faits
 & remporter de sa bonté les responses raisonnables &
 nécessaires pour l'entretènement des Edits. Suiuant cet
 ordre resents vne plus pressante necessité que iamais
 nous estans adressez à sa Majesté par nos Deputez ge-
 neraux en l'année mil six cens dix neuf, elle eut agreable
 d'octroyer à nostre tres-humble requeste vn breuet
 portant permission de nous Assēbler en la ville de Lou-
 dun au 25. de Septembre. Où nous estans trouuez de
 toutes les Prouince du Royaume & de la Souueraineté
 de Bear, les cahiers de nos plainres estans dressez, nous
 les presentasmes en toute humilité à sa Maïesté, la sup-
 pliant que par vne fauorable response aux Principaux ar-
 ricles & plus importants griefs. nous peussions rempor-
 ter dans toutes les prouinces, par les tesmoignages de
 sa bonne volonté à nostre protection, dequoy rasscu-
 re

*Assemblée
 à Loudun*

rer tous les ſuiets de la Religion, contre tant de menaces & de craintes dont ils ſe voyent environnez. Ce ne ſeroit iamais fait ſi nous voulions eſtaller icy le ſubiet de toutes ces plaintes. Nous en toucherons ſeulement quelques vnes pour en faire voir l'importance, & la neceſſité d'obtenir ſur icelles vne prompte iuſtice.

Nous nous plaignons que Leyronne place de ſeureté nous auoit eſté rauie d'entre les mains. Que deux des noſtres pourueus d'offices de Conſeillers en la Cour de Parlement de Paris n'auoient peu obtenir leur recepiſſon durant trois ans continus qu'ils la pourſuiuoient. Que l'exercice de noſtre Religion banni de Clermont de Lodeue place de ſeureté, ſur le reſtabliſſement d'iceluy pourſuiuy par nous, on s'eſtoit oppoſé avec armes à l'exécution d'un Arreſt du Conſeil du Roy. Que nos Temples auoient eſté brullez ou demolis a Bourg en Breſſe, à Moulins en Bourbonnois, & a Leual pres Guyſe. Qu'à Baux en Prouence le ſieur de Vere Cappitaine du Chateau apres pluſieurs menaces & violences, pour defendre & empescher l'exercice à ceux de la Religion, les auroit finalement chaffeſz hors de la ville par force, & avec main armee le 8. Feurier 1620. Qu'on n'auoit peu obtenir iuſtice des excèz outrageux faictz à quelques vns de la Religion à Baugenci & du toxain ſonné ſur eux, & de ce que les coupables qui auoient precipité deux hommes du haut du grenier, & perué l'un à coups d'eſpee, ont eſté ouïs en teſmoignage aux informations qui ont eſté faictes par le Lieutenant general en la iuſtice d'Orleans, & que nonobſtant le renuoy de la cauſe au Parlement de Paris, le Procureur general en icellé n'a tenu compte d'en faire pourſuite. Que nos Paſteurs auoient eſté chaffeſz violemment hors des villes de Bourges & de la Chaſteigneraye. Que pluſieurs perſonnes faiſans profeſſion de la Religion à Chaalons ſur

Saonne en auroient esté chassées & exilées, comme aussi du Duché de Barrois. Que les lieux à nous accordez pour l'exercice de la Religion pres des villes de Lyon, Dijon, & Langres nous estoient empeschez. Qu'ès lieux où les habitans sont en possession d'y faire ledit exercice depuis les années 1566. 1567. où partant ils ont par l'Edict toute liberté, ils y sont troublez, comme à la Chasteigneraye, à la Chastre, à S. Cyprian, la Herle, Veus, Maussac, Langon, Bourg de Condé en Normandie, à Agiene en Viuarets, à S. Marcelin en Forest, à la Chaulme en Xainctonge par opposition formelle des officiers, à Florence Picusqué, Montfort & Puget par les Consuls, pres la ville de Perigueux, à Montignac Charente par sentence du Seneschal d'Angoulmois sur peine de mil liures. Que l'education des enfans estoit ostee aux peres de la Religion pour les instruire en la Religio contraire, comme au sieur le Maistre M. des comptes à Paris, & par Arrest de la Cour de Parlement de Rouen, en la cause d'un nommé Couurechef. Que plusieurs enfans de la Religio auroient esté enleuez par des Moines, comme à Ambrun le fils d'un Bourgeois, à Millaud le fils du sieur Valette, à Leytoure un enfant aagé de dix ans nommé François Aram, par le Iesuite Regour le 4. Ianuier 1620. Que nos sepulchres estoient inhumainement violez. ou les sepultures empeschees en plusieurs lieux, comme à Aix en Prouence, à Gordes, à Mirabeau, à Ongle, à Xaintes, à S. Georges d'Oleron, & en plusieurs lieux de la Guyenne & autres endroits avec cruauté & barbarie. Que nos pauvres malades estoient chassés des Hospitaux, ou forcez contre leurs consciences, comme en la dernière contagion à Paris, en l'Hospital S. Louys, ou plusieurs y furent violez, & tout accez denié aux Ministres & Anciens pour les consoler. Que les Parlemens au preiudice des Chambres establies s'at-

tribuoient la cognoissance de nos causes, comme le Parlement de Bourdeaux plusieurs fois, & particulièrement au fait des habitans du Mas d'Agenois, qui en ont souffert de tres-grandes vexations, dont plusieurs d'iceux sont morts en prison. Mais principalement és causes criminelles, comme le Parlement de Thoulouse, lequel ayant condamné Iehan de Nasse Greffier de Montauban à l'amande honorable, n'a voulu deferer aux Arrests du Conseil, portans renuoy en la Chambre de Castres. Et encor ledit Parlement de Bordeaux en la cause des habitans de Tartas, qui en la surprise du Chasteau ayans esté cruellement traittez, outragez & chassez, auroient esté poursuiuis & mal menez audit Parlemēt, lequel sur la reccrimination des mutins & seditieux auroit retenu la cognoissance de la cause au preiudice de la Chambre de Nerac. Au Parlement d'Aix quantité des Notaires auroient esté cruellement retenus en prison plusieurs anneés, nonobstant leurs causes renuoyees & retenues en la Chambre de Grenoble suiuant l'Edict. Nous demandions encore que le changement faict és villes de Montault, Vareilles, Tarascon, Montgaillard au Comté de Foix (esquelles rien ne doit estre innoué suiuant le breuet de 1598.) fust reparé. Qu'il pleust au Roy octroyer le breuet de la garde des places de seurété, avec la deliurance del'Estat des places de Dauphiné. Faire reuocquer l'Arrest de main leuee des biens Ecclesiastiques de Bearn. Faire rendre la ville de Priuas entre les mains des hebitans, & leur rendre iustice sur les excez violences & outrages qu'on leur auoit faicts. Outre vne infinité d'autres plaintes publiques & particulieres trop longues à deduire. En toutes lesquelles nous esprouuâmes le pouuoir de nos ennemis si grand, que toute iustice nous y fut desniée, & ne remportâmes pour toute responce qu'un cōmandemēt absolu de nous separer.

Mais comme l'urgence du mal & la necessité du remede nous fit recourir plusieurs fois vers sa Majesté. Nos haïeux commencerent lors de qualifier nostre instance & tres-humble supplication reïteree, du tiltre de rebellion, pour nous oster l'esperance de toute iustice, pour nous rendre odieux, & pour ouurir la porte à vne guerre & persecution obtindrent de faire publier vne commination de crime contre nous (comme si c'estoit crime que de se plaindre) menaçans tout haut nostre perseuerance, des armes du Roy, & faisans verifier extraordinairement des Edicts burdeaux dans les Parlemens pour la necessité des preparatifs à nous faire la guerre. Le Roy neantmoins par la bonté de son naturel & la force de son inclination à iustice, eschappât aux contraintes de nos ennemis, nous fit promettre par la bouche de Monseigneur le Prince & de Monsieur de Luynes à present Comestable, qui donnerent leur parole à Messieurs de Lessiguieres & de Chastillon pour nous en assurer. Qu'apres nostre separation dedans le terme de six mois du iour d'icelle, la ville de Leytoure nous seroit rendue, les Conseillers receus au Parlement de Paris. Le breuet de la garde des places de seureté & l'estat de celles de Dauphiné nous seroient deliurez. Et le surplus de nos cahiers respondus fauorablement, & les responses executées de bonne foy, & que dans sept mois du iour de la separation, les Deputez de Bearn seroient oüys sur ce qu'ils voudroient monstrier à sa Majesté. Et en cas que ces promesses ne fussent executees dans le temps, nous pourrions nous retrouver ensemble pour demander derechef a sa Majesté iustice sur nos plaintes. Or d'autant que de la condition de ces promesses, des assurances sous lesquelles on nous les fit valloir, & de la bonne foy promise en l'execution d'icelles, depend la iustification principale de nostre procedé

suiuant, pour lequel nous sommes iniustement declarez
 criminels & traitez par la rigueur des armes. Que tout
 le monde voye icy sur quel fondement à esté appuyé la
 bonne foy en laquelle nous sommes, & le droit que
 nous auons eu de nous r'assembler. Pour confirmation
 de la promesse qui nous en fut faite, on nous represen-
 toit que c'estoit la premiere parole que le Roy eust don-
 né à ses sujets de la Religion, depuis qu'il tient le gou-
 uernail de son Estât. Monsieur le Conestable adiou-
 stoit que la sienne y interuenue nous vaudroit breuets,
 & peut-estre encor d'auantage. Le Roy de sa propre
 bouche le confirma depuis à Fontainebleau aux Depu-
 tez qui l'aduertirent de nostre separation, en presence
 de Monseigneur le Duc de Lefdignieres qui nous en
 auoit donné l'assurance. Or nous eust-il esté loisible
 de desirer, ou de nous figurer quelque autre permission
 plus valable que la sacree parole du Roy, la premiere
 qu'il nous eust donnée? Le papier & l'ancre ne peuuent
 adiouster de poids ny d'autorité aux paroles des Roys.
 Et certainement nous eussions creu estre indignes de la
 grace de nostre Roy, & iniurieux à son autorité, si nous
 eussions requis cette permission sous vne plus grande
 seurété que sa parole. Ainsi nous estans separez le 13.
 d'Apiril de l'annee derniere, apres vn acte dressé entre
 nous de nostre obeissance contenant toutes les condi-
 tions & promesses susdictes, avec ordre donné à ceux de
 la Rochelle de faire la conuocation, le cas estant escheu,
 au lieu qu'ils iugeroient le plus commode. Les Deputez
 s'estans retirez, & ayans rendu compte dans les Prouin-
 ces furent continüez, ou d'autres subdeleguez à eux,
 pour se retrouver ensemble, en cas d'inexecution des
 choses accordees suiuant la condition des promesses.
 Cela s'est fait en toutes les Prouinces publiquement au
 lieu de sa M. & de Messieurs de son Conseil. On ne l'a

point trouué mauvais. Le Roy ne fit aucune declaration contraire. Cependant il est tres certain que s'il y auoit eu quelque entreprise ou attentat contre l'autorité du Roy, ce seroit en la nomination des Deputez; mais comme elle estoit recogneüe legitime par la permission; la condition pendente, aussi nos Deputez generaux faisans la poursuite de l'execution des choses promises, n'ont point fait de doubte de l'accompagner tousiours de cette remonstrance vers Messieurs du Conseil. *Faites nous iustice & ne nous donnez point la peine de nous r'assembler.* Monsieur le Prince mesme estant allé plusieurs fois au Parlement pour y faire verifier la iussion du Roy sur la reception des Conseillers, leur representa la permission de nous r'assembler, à quoy par leurs refus ils donnoient occasion.

Or le temps prefix des six mois pour l'accōplissement des promesses escheant au tresiesme d'Octobre sans qu'elles eussent sorti effect, le Roy s'estant acheminé en Guyenne au mois de Septembre, fust sollicité par nos euenemis de faire inionction à ceux de Bearn d'executer main-leuee, & au Parlement de Pau d'en verifier l'Arrest. Le terme accordé pour leurs remonstrances, que sa Maiesté auoit promis d'entendre par la bouche de leurs deputez, s'estendoit iusques au treiziesme de Novembre; Ce qui fit que sur la iussion du Roy, le Parlement de Pau donna Arrest par lequel il ordonne que les Deputez feroient leurs remonstrances à sa Maiesté dans le temps qui leur estoit accordé (confirmé de rechef par lettre escriite le 21. Septembre par sa M. audit Parlement) autrement ledict temps passé l'Arrest de main-leuée demeureroit verifié. Sa M. non contente de cette Arrest & sans attendre les remonstrances de ceux du pays, est poussé par nos ennemis à s'y acheminer. Et nonobstant que le Parlement par autre Arrest

de verification pure & simple eust preueni la venue de
 la M. elle ne laissa par l'induction de nos haineux d'en-
 trer dans le pays avec son armée. Nous nous tairions
 icy volontiers de la desloyauté de nos ennemis, & des
 cruautéz y exercées par leurs inductions. Si leurs accu-
 sations calomnieuses & la douleur cuisante de nos mi-
 seres ne nous obligeoient maintenant d'auoir la bou-
 che ouuerte pour nostr justification, & pour en crier
 vengeance deuant Dieu & les hommes. Nous ne par-
 lerons point du changement faict au pays par l'vnion
 à la Couronne de France, encore qu'il soit euidēt quel-
 le n'a pas tant esté faite pour aucun aduantage de la Frā-
 ce, que pour donner plus de lieu à l'alteration de nostre
 Religion. Nous toucherons seulement en peu de mots
 ce qui à esté faict directement pour y ruiner la liberté
 de l'Euangile. Le Roy donc estant à Nauarrenx, & vou-
 lant cōseruer au sieur de Sales la promesse qui luy auoit
 faict donner dez Bourdeaux, & confirmée dans le pays
 de le maintenir au gouuernement de la Ville, à ce con-
 uié encores par les longs seruices dudit sieur de Sales,
 & par la prompte obeissance qu'il tesmoignoit par tou-
 tes sortes de deuoirs à sa M. nonobstant ce pressé par
 nos ennemis de luy oster le Gouuernemēt & le donner
 à vn Papiste, mais retenu par la religion de ses promes-
 ses. le Iesuite qui est aupres de lui interposant son Cō-
 seil de conscience (ou plustost sans conscience) persua-
 da à sa M. qu'il luy estoit loisible de fausser sa promesse
 par vn equiuoque & distinction vrayement digne de
 l'indignation de Dieu & hommes. *Vostre promesse, dit-il,*
Sire, est d'Estat ou de conscience. De conscience, dit-il, elle ne peut
car elle est contraire au bien de l'Eglise : Estant donc d'Estat, Vo-
stre Maesté doit croire ses Conseillers, qui luy remonstrent que
pour le bien de son seruice il importe que cette place ne soit plus
entre les mains d'un Huguenot. Ainssi le Roy iuduit par le

maistre de la conscience qui se fait garant pour luy envers Dieu de tout ce qu'il fera par son conseil, fit commandement au sieur de Sales de se demettre de son gouvernement, donné à l'instant au sieur de Poyane ennemy iuré de nostre Religion. Puis ayant fait retirer la garnison de la ville, & desarmé les habitans, il y fut mis quatre cens soldats Papistes sous le commandement dudit sieur de Poyane. Cela fait pour estre tout ce qui restoit de seurété à ceux de la Religion, les six Capitaines des Persans furent cassez, & les villes de Sauueterre, Orthez, Oleron & Nai, remplis de garnisons Papistes. Le Roy estant de retour à Pau, donna la presidence aux Euesques dans les Estats y conuozquez, pour leur donner par ce moyen l'auctorité principale dans le pays. Et Dieu veuille qu'il n'experimente encore d'eux la mesme perfidie qui en chassa son pere en son enfance. Et que les pratique de l'ennemy voisin ne trouuent en eux la facilité à luy donner l'accez dans la France par cette porte, ou la fidelité des nostres à tousiours serui de rempart. Or afin qu'il ne restast rien ou la seurété & liberté de nostre Religion ne fussent violées, les Papistes furent faits maistres de tous les Temples ou s'en faisoit l'exercice, quoy que la condition de la main-leuée mesme portast cette reserve que les temples demeureroient aux nostres tandis qu'il leur en seroit pourueu d'ailleurs. Tous ces changemens se faisans en haine de nostre Religion & comme pour la bannir hors du pays, l'audace de tous ceux qui sont nourris & incitez continuellement à nous mal faire accreut de telle sorte, qu'au lieu que le respect de la presence du Roy les deuoit retenir, leur licence au contraire desborda si auant, qu'en tous les lieux où ils mirent le pied, nos temples ne peurent estre garantis d'infinis rauages & scandales, iusques là que dedans

Pau mesme (le Roy y estant) ayant brisé la chaire & les bancs du Temple, on y brusla publiquement la Bible & le nouveau Testament. Les Ministres en diuers lieux furent outragez, & plusieurs personnes contraintes contre leurs consciences à s'agenouïller aux processions. Le surplus des insolences violences & excez que ce pauvre pays resentit est innombrable, & tel que les plus cruels ennemis auroiét peu exercer au milieu d'une terre conquise. La dessus pour triomphe Arnoux fait vn liure intitulé: *Le Roy en Bearn*, où ne se pouuant tenir de ioye de voir ses desseins si auancez, donne clairement à cognoistre iusqu'ou il pretend qu'ils se doiuent estendre. Nous enseigne quelle suite nous en deuons attendre. Le Roy a son compte ne doit cesser iusqu'à ce qu'il ait esteint la Religion qu'il abhorre. Et le haut esleuant, pour ce commencement & pour la suite du dessein, au dessus dufen Roy son Pere, laisse à sous-entendre que la mort de ce bon Roy luy ayant esté aduancee pour le refus qu'il auoit faict d'en venir insques-là: Sa Majesté doit auourd'huy attendre d'eux vn plus favorable traitement à la charge de continuer.

Le Bearn reduict en ce miserable estat, le Roy s'en retournant laissa vne partie de son armee en Guyenne, & espendit le reste par le Poictou, remplissant toutes nos Eglises d'effroy. Et de là en auant on n'oït parler que de la ruine des Huguenots. Tout le discours de la Cour n'est que du siege de la Rochelle. On dit qu'il n'y en a pas pour trois mois, qu'on n'attend plus que la saison commode. Cependant toutes les promesses faictes à Loudun estant negligees, le temps passé sans qu'il y en eüst rien d'accompli (hors la deliurance du breuet de la garde des places) quelque instance qu'en eussent faicte nos Deputez generaux durant tout ce temps; la conuocation des Deputez nommez par les Prouinces (& obli-

gez de se reünir pour représenter leurs requestes à la Majesté (sur l'inexécution des choses promises) se fait par la Ville de la Rochelle qui les y assigne au 21. de Novembre. Nous ne voulons point obmettre qu'après les changemens faicts au Bearn, la ville de Leytoure fut remise à vn Gentil-homme de la Religion, mais nous remettons à iuger à toutes personnes equitables si vne garnison Papiste y ayant esté laissée, & contre l'ordre du gouvernement precedant de la ville, vn Lieutenant établi, lequel mesme n'a iamais eü approbation du Synode de la Prouince, suiuant le desir du breuet du Roy de la garde des places de seurete: la bonne foy a esté obseruee en ce poinct comme elle y auoit esté promise. Nous remettons à iuger encore, si apres que toutes les seuretez d'un pays nous ont esté arrachees, ce chef des promesses executé de la sorte en tous les autres negligez & demeurez sans accomplissement, le droit de nous plaindre d'une cōtrauention si manifeste, & de ces nouueaux griefs si cuisans & de tous les autres qui restoiēt, & a cessé, si la necessité en est diminüee, & si l'accez & la liberté nous en ont deu estre interdits. Telle estant donc l'importāce des raisons de nous rassembler, & de recourir promptement en toute humilité à la iustice du Roy, comme nous en auons permission, neantmoins à peine estions nous encore tous rendus en ce lieu, qu'on fit publier vne déclaration pour nous rēdre criminels, denonçant ire & iugement de condamnation contre les conuoquans & les conuoquez. Mais cependant autant que nous sentons que le mal nous presse; que nos consciences nous interpellent d'accōplir la charge que nos Eglises nous auoient donnees; que nous y auons en sincerité le tesmoignage de proceder avec iustice. Nous nous mettōs en deuoir de presenter au Roy nos tres-humbles remonstrances pour nous purger des fausses accusations

& des crimes dont nos ennemis nous chargeoient, abusans de l'autorité de son nom pour destruire la verité de la parole qu'il nous auoit donnee. Luy faire entendre l'urgente necessité de nos iustes plaintes. Le requerrir en toute humilité qu'il luy pleust de deliurer nos Eglises de tant d'allarmes & d'espouuante mens dont elles se voyoient de tous costez enceintes. En somme le monstrier nostre protecteur contre vne si violente oppression qui nous est faicte par tout son Royaume au preiudice de l'autorité de ses Edicts, & contre les menaces ouuer tes de nostre ruine, que l'exemple des maux de Beau rendoient si formidables. Mais nous trouuons que nos ennemis auoient bousché les oreilles de sa M. a toutes nos requestes, qui sont reiettees sans qu'on veuille rien receuoir ny enrendre de nostre part. Et en mesme tēps on procede dans les Parlemens & Bailliages criminellement contre nous. On menace cette ville & nous de guerre ouuerte comme rebelles & seditieux.

Or la dessus iugeans par l'experience du passé, & à la methode de nos ennemis, en laquelle nostre dommage ne nous auoit desia rendus que trop sçauans & experimenter, que cette accusation & ces menaces se faisoient pour autoriser vn refus & deny de iustice, & nous faire perdre toute esperance de rien obtenir à l'auenir en nos plus iustes & necessaires plaintes, nous insistons à plusieurs fois en la iustification de nostre innocence, & persueurons à supplier, & a ietter aux pieds de sa Maiesté nos tres-humbles requestes. Mais comme tout accez nous est interdit, & que pour charger nostre procedure de haine, mesmes à l'endroit des nostres, & pour faire naistre des diuisions parmy nos Eglises, nos ennemis faisoient donner quelques paroles à nos Deputez generaux & a plusieurs autres d'entre nous, que le Roy, resolu de ne rien ouyr de nostre part, vouloit neantmoins

traitter fauorablement ses ſuieſts de la Religion, & leur rendre iuſtice. Qu'il entendroit volontiers leurs plaintes par les deputez generaux & ſous le nom des Eglises. Pour experimenter quel effect auroient ces paroles, nous intermettons toute pourſuite en noſtre nom, & nous retenons dans le ſilence, la remettons entiere à nos Deputez generaux pour la faire en leur nom & au nom des Eglises. Et certainement nous ne craignons point d'adiouſter que ſi l'eſtat de nos maux croiſſans de iour en iour, & menaçans de pis, n'eust accru noſtre apprehenſion & noſtre iuſte deſiance, vaincus de tant de chagrain, de rebuts, de menaces, & de deſeſpoir de tout ſucces, nous n'aurions eu plus grand deſir que de nous retirer, & peut eſtre que nos Eglises nous l'euffent pardonné. Mais en meſme temps la fraude de nos ennemis s'eſt deſcouuerte plus auant, & la perſecution proiettee contre nous eſclattant en diuers endroits à maniſteſté leur deſſein par tant de perfidies & de violences, qu'eſtās maintenant obligez pour la iuſtification de noſtre innocence, & de noſtre deſſenſe legitime contre la guerre qu'ils nous font, d'eſtallercy leur procedure aux yeux de tout le monde, nous douterions pour l'honneur de la France de publier des faiſts ſi odieux, ſi en meſme temps on ne recognoiſſoit que ceux qui en ſont auteurs ſont ſes vrais ennemis, & ont coniuré ſa ruine avec la noſtre.

Premierement ſous l'apparence de ces belles promeſſes, que le Roy vouloit entretenir les Edicts faiſts en faueur de ſes ſubieſts de la Religion, & leur donner contentement ſur leurs plaintes des contrauentions faiſtes à iceux, on attire à la Cour Monsieur le Duc de Lesdiguieres par l'eſperance que ſon entremiſe contribueroit à obtenir ce contentement, & ſous cette meſme aſſurance on entretient tous les autres Seigneurs qui

sont parmy nous, & les personnes plus considerables. Cependant en mesme temps Monsieur de Montmorenci leue les armes contre nous en Languedoc, & apres plusieurs actes d'hostilité commis, attaque Villeneuve de Berg que nous tenions en Viuaréz. Et comme il estoit aisé à preuoir que cette violence trouueroit de l'opposition, on y enuoye de la Cour le sieur de Reaux Lieutenant des gardes du corps, portant en apparence commandement de faire desarmer tout ce qu'il trouueroit armé. Monsieur de Chastillon (de qui la prudence & l'affection au seruice du Roy & à la paix de son Royaume auoit retenu iusques-là l'impatience des peuples desireux de repousser la force qui leur estoit faicte) ayant esté aduerti de la charge dudit sieur de Reaux par vn Archer qu'il luy enuoya, continue d'arrester l'esmotion des nostres, & comme il attend des nouuelles plus particulieres dudit sieur de Reaux & de l'obeissance de Monsieur de Montmorenci au commandement qu'il portoit, Villeneuve de Berg qui auoit desia repoullé deux escalades & tous les efforts qui auoient esté faicts à la porte, s'estant renduë au seul nom du Roy, entre les mains dudit sieur de Reaux, & soumise à sa protection & sauuegarde, Monsieur de Montmorenci y estant entré y establit garnizon, qui à l'instant mesme y commet toutes sortes d'excez & d'outrages. Sur ce les nostres ayans esté induits à s'armer pour la defiance de telles fraudes, & pour la necessité de leur defense. Le sieur de Reaux estant venu trouuer Monsieur de Chastillon, & sous l'assurance qu'il luy donne que Villeneuve de Berg seroit renduë, & par l'esperance que selon les conuentions du traité accordé entr'eux toutes choses seroient restablies en paix, ayant obtenu qu'il desarmeroit, ainsi qu'il y satisfaisoit de bonne foy, Monsieur de Montmorenci au lieu d'y obeyr de sa part, loge cinq ou

30
fix compagnies dedans Villeneuve-de Berg, & y fait
proclamer a son de tambour le sieur de Peraut pour
Gouverneur, & de plus ayant deliuré plusieurs nou-
velles commissions, dattees du lendemain que ledit
sieur de Reaux estoit arriué aupres de luy, il assiege
Vals autre place de Viualets, tenue par les nostres, où
mesmes ledit sieur de Reaux, cependant que Mon-
sieur de Chastillon se reposoit sur la parole, de faire ac-
complir le traité à Monsieur de Montmorenci, assi-
stoit luy-mesme en personne, & estoit spectateur de la
batterie. Cette place petite & foible n'ayant rien que
ses habitans apres avoir enduré cent coups de canon,
s'estant rendue à composition honorable, contre la ca-
pitulation expresse toutes sortes de cruauitez violences
& barbaries y ont esté exercées sur vne infinité de pau-
vres personnes innocentes cruellement meurtries ou
violees Et contre la foy du mesme traité le semblable
a esté encore fait en suite à Valons autre place voisine.
Ces fraudes & contrauentions aux traittez simulez ma-
nifestent à tous que la parole du Roy & son comman-
dement apparent n'ont esté employez que pour seruir
de piege à nostre bonne foy & pour donner occasion
sous vn adueu tacite de tout ce que Monsieur de Mont-
morenci feroit au contraire, à nous faire perdre ces
places.

En mesme temps encore le sieur de Poyane s'estant
fortifié dans le Bearn pour en chasser Monsieur de la
Force on enuoye de la part du Roy le sieur de la Sala-
die à Monsieur de la Force pour luy faire commande-
ment de congédier quelques troupes qu'il tenoit pres
de luy pour sa seurete & pour maintenir l'autorité du
Roy en la charge au gouvernement du pays, contre les
entreprises violentes dudit sieur de Poyane. Mais ledit
sieur de la Saladie au lieu de remporter la réponse de

Monsieur de la Force au Roy, comme il faisoit sembler, est allé par la Guyenne porter commandement d'armer à Messieurs d'Elpernon, de Vignoles, & à plusieurs autres, d'où nous auons veu à l'instant la Guyenne toute remplie d'armes, outre celles qui y auoient esté auparavant laissées.

D'autre costé nous auons veu en ce mesme instant les troupes laissées dans le Poictou s'auoisiner des environs de cette ville de S. Iean d'Angely. Et par vu Arrest du Conseil tous les Bureaux des receptes transferez de toutes les places de nostre seureté où ils estoient establis, argument sensible, qu'encore que la seule ville de la Rochelle fust menacée, on en vouloit neantmoins à toutes les autres, & d'un dessein de guerre generale contre nous formé & proche: Cette translation ne se faisant pour autre cause que pour nous oster le moyen, la persecution ia resoluë suruenant, de nous ayder de ces commoditez pour nostre defense, prouue par consequent qu'on se preparoit de nous y reduire.

Or comme par ces alterations nouvelles à nostre respect, ces menaces, l'oppression & la persecution ouuerte en tant de lieux, nous preuovions assez l'orage qui nous panchoit sur la teste & prest à esclatter, recognoissans encore que nos ennemis enflés du succez rencontré au ravage & desolation du Bearn n'auoient attendu depuis, que la saison commode de continuer nostre ruine par vne guerre ouuerte, ayans de cela prou d'enseignement par les propos qu'on auoit tenu ouuertement, au retour de Bearn, du siege de la Rochelle, des moyens & de la facilité de la prendre. Par les discours qu'à toutes heures on tenoit au Roy de la ruine des Huguenots. Par les calomnies qu'on nous sulcroit pour en auoir pretexte, par les menaces que nous entendions, & par les apperts quis'en faisoient visibles,

ment. Neantmoins sous les parolles qu'on donnoit de la bonne volonté du Roy enuers ses suiets de la Religion & à l'autorité de ses Edicts, nos Deputez generaux à l'entremise delquels toute la poursuite estoit remise, presenterent à sa Maesté vn cahier de plaintes pour auoir reparation sur quelques griefs des plus importants, & d'une plus prompte & necessaire execution pour le repos & la seureté de nos Eglises.

Mais apres plusieurs instances & remises, apres diuerses sollicitations & prieres de tous ceux qui viennent les premiers rangs entre nous, mesme de Monsieur le Duc de Lesdiguières present à la Cour, nos Deputez generaux n'ont iamais peu obtenir aucune response. Seulement Monsieur de Fabas l'un d'iceux, & vn Gentil homme de la part de Monsieur le Duc de Lesdiguières estant venu vers nous, & nous ayans fait entendre conformément à vn escrit de mondit sieur de Lesdiguières signé de sa main. Que pour tout contentement sur tant de plaintes, Monsieur le Duc de Lesdiguières se promettoit (car le Roy, quoy qu'on fist esperer à nos Eglises qu'il vouloit entretenir ses Edicts, ne donnoit pas mesmes icy la parole, ny de sa bouche, ny par aucun Ministre de l'Estat) que moyennant nostre separation preallablement effectuee, on obtiendrait la retraitte des troupes des lieux où elles nous donnoient quelque defiance. Que l'estat des places de Dauphiné seroit cherché pour nous estre deliuré dans six mois au cas qu'il se trouuast. Qu'il seroit pouruen pour ceux de Bearn au remplacement des deniers accordez au lieu des reuenus Ecclesiastiques. Que Monsieur de la Force & ses enfans seroient laissez en leurs charges. Et au surplus que parole tres-assurée luy auoit esté donnee que rien ne seroit entrepris, atten dât le temps qu'il conuiendrait pour auoir nos resolutions. Mais comme nous
vaguions

vaquions à icelles nous eusmes aduis par Monsieur Chalas, l'autre de nos Députez generaux, que le lendemain & contre lesdites promesses nos ennemis auoient porté le Roy a resoudre absolument & ouuertement la guerre contre nous. Et a faire le departement d'une armee de quarante & vn mille hommes de pied, & de six mille cheuaux. Et que la charge de Monsieur de la Force du gouuernement de Bearn auoit esté donnée a Monsieur le Marechal de Themines, & celle de Capitaine des Gardes qu'auoit Monsieur le Marquis de la Force son fils, donnée a Monsieur le Marquis de Maubray, & que Monsieur de Monpoüillan vn autre de ses fils auoit en commandement de se retirer de la Cour.

En ce mesme temps comme nos ennemis hastoient nostre persécution par toutes sortes de moyens, les predications seditieuses, l'instruction des confessions, les libelles diffamatoires, les calomnies & impostures contre nostre fidelité, l'impression de la haine du Roy contre nostre Religion, & les declaratiōs de guerre publiees contre nous produisans leur effect, est arriué en la ville de Tours le 16. d'April qu'un nommé Martin le Noir peu auparauant conuertia nostre Religion, pour raison de quoy il auoit souffert plusieurs iniures & conuices, iusques la que le peuple ayant fait vne esgrie de paille, & l'appellans tantost de son nom, tantost de Martin Luther, l'auoient publiquement bruslee, sans qu'on ait iamais peu obtenir iustice d'une insolence si outrageuse: estant lors decedé ainsi qu'on le portoit en terre, le peuple s'estant mutiné apres auoir seui sur son corps & ceux qui le portoient au sepulchre, apres auoir commis toutes sortes d'indignitez & d'inhumanitez au detterment d'iceluy, cherchant a faire pis, esmeut vne plus violente sedition, & ayant abbatu & demoly vne maison proche du cimetiere, court au Temple, esloigné de la d'un quart

de lieuë, y met le feu, entre dans la maison du Concierge, la pille & la saccage, & estant accreu iusqu'au nombre d'une effroyable multitude demeure trois iours entiers a continuer l'embrasement & la demolition du Temple sans que le Magistrat y interuint, où qu'y intervenant trop tard il ait peu suffire a reprimer vne violence si enragee. De la l'exemple de cette sedition passe incessamment en la ville de Poictiers, où le peuple poussé de pareille fureur a demoli de fonds en comble les murailles du cimetiere où ceux de la Religion enterrent leurs morts, rompu & brisé toutes les tombes, & prest à commettre vne semblable violence contre le Temple, si le Magistrat plus soigneux n'en eust arresté le cours.

Or toute la suite des conseils & des actions de nos ennemis iusques là, & principalement ces funestes & espouvantables esclandres, ces grands preparatifs de guerre, l'iniuste & rigoureux traitement fait sans cause a Monsieur de la Force & a ses enfans contre les assurances tout fraichement donnees du contraire, avec les armes toutes prestes sous le commandement de Monsieur d'Espernon pour l'invasion de Bearn, resmoignoient & donnoient assez a cognoistre que l'heuré d'une persecution generale estoit venue, & que le dessein ia long temps formé de nostre ruine estoit esclos. Pour cette cause nos ennemis, afin que leur perfidie peult iouer leur ieu & faire son effort font promettre d'un costé que le Roy fera faire iustice de la sedition de Tours, & afin de leuer ailleurs les desiances, ou pour endormir les plus confidens, font verifier en tous les Parlemens vne declaration du 27. d'April, portant que le Roy voulant chastier quelques vns de ses suiets de la Religion (qu'on appelle rebelles & seditieux) vouloit & promettoit d'entretenir ses Edicts a tous ceux qui demeureroient en son obeissance, les maintenir & conseruer en toute

liberté & seurété suivant le contenu des Edicts. Et finalement font donner assurance à Monsieur de la Force, que quittant le Bearn, & en donnant aduis a Monsieur d'Espernon, on luy feroit commandement de se retirer. Or voicy quel a esté l'effet de ces promesses. Nous commencerons par le dernier chef qui a esté le premier violé. Monsieur de la Force s'estant retiré, & ayant donné aduis à Monsieur d'Espernon de son desarmement & de sa retraitte par le sieur Baron d'Arros, incontinent apres Monsieur d'Espernon est entré avec son armee dās le pays, s'est saisy de toutes les villes & places où ceux de nostre Religion estoient en plus grand nombre, les a remplis de fortes garnisons, razé le chasteau de Montanay, & reduit tous les nostres à vn si déplorable estat que la plus part, voire les principaux ont esté contraincts de s'en fuir, d'abandonner leurs biens & leurs pays, avec meurtre de plusieurs personnes desarmees & sans deffense, & les autres demeurent à présent retenus sous vne miserable seruitude, souffrans toutes sortes d'injures & de cruantez. D'autre costé le Roy s'auançant pour l'execution des menaces publiees cōtre cette ville, apres auoir respandu par tout ces assurances qu'il n'en vouloit point au general de ceux de nostre Religion, & donné particulieres promesses aux Gouverneurs de quelques places de nostre seurété, qu'entrant en icelles il n'y innoueroit rien, ayant passé par Tours où la sedition s'estant renforcee, & le Commissaire enuoyé pour l'execution de la iustice chassé dehors, les prisonniers tirez des prisons par violence, les maisons des nostres (qui par l'effroy du premier tumulte s'estoient retirez) pillées & saccagees, à peine la seule reuerence du Roy violée a esté expiée par le supplice de cinq miserables belistres. Et cela encore pour entretenir la credulité de ceux qu'on voudroit repaistre d'opinion que l'entrepr

nement des Edicts seroit continué. Sa Majesté est venue a Saumur où Monsieur du Plessis, sous les promesses expressees qu'on luy auoit données que rien ne seroit changé au gouvernement, & sous la foy de la declaration publiee trois sepmaines auparauant, ayant ouuert les portes de la ville & du chasteau au Roy, a fait l'esfay a nostre grand dommage, des fraudes & perfidies de nos ennemis, qui ont induit le Roy a luy oster le gouvernement, & a mettre vne garnison de 400. soldats de ses gardes dans le chasteau, & vn autre dás le faux-bourg de la croix verte, & par ce moyen nous faire perdre ceste place de seureté. Avec quelle horreur & indignation toute la France peut elle voir que les ennemis de son repos & du seruice du Roy abusent ainsi perfidement de son nom & de sa parole, pour commettre des desloyauzez si detestables? Il n'y a que dix mois que par breuet expres de sa Majesté la garde des places de seureté nous a esté continiee pour quatre ans. Entre routes, la ville de Saumur estoit vne des plus importantes a nostre seureté. Elle estoit en nos mains depuis que le feu Roy estant Roy de Navarre appellé par le Roy Henry troisieme a son secours, vint suivy de ceux de nostre Religion pour le deliurer de la captiuité & de la tyrannie de la Ligue, on luy donna ceste ville pour le passage, & elle demeura dès lors en nos mains pour marque de nos bons seruites, & de nostre fidelité a ceste Couronne. Ceste place sise sur la Loire estoit pour nous seruir, aux persecutions & aux confusions que les ennemis de cest Estat esmeuent auourd'huy, de retraitte, ou de passage commode à tant de pauures troupeaux descouverts, pour se sauuer de la furie des feux ou des glaiues qu'on leur prepare. Ceste ville durant le repos des années passées a leui de pepiniere a l'Eglise, & estoit le logis d'vne Academie florissante. Pour ces causes la cruauté de nos ennemis a

peussé le Roy à nous commencer la guerre, en laquelle ils le precipitent contre nous, par vne playe si cuisante, que pour nous faire avec plus de facilité toutes les calomnies precedantes, tous les pretextes de desobeissance & rebellion, toutes les declarations particulieres contre nostre assemblée & cette ville, toutes les declarations & promesses frauduleuses en faueur de ceux qui demouroient en l'obeissance du Roy ont esté employees. Car pourroit on bien dire que Monsieur du Plessis, de qui personne n'ignore les longs & fideles seruices rendus au feu Roy & a sa Maïeste a present regnante ait commis quelque desobeissance & rebellion, Ains n'auoit-il pas mesmes passé toute mesure de confiance en la desloyauté de nos ennemis pour le respect du seul nom du Roy? Et estimant destourner de dessus sa teste l'orage duquel il voyoit vne partie des nostres ouuertement menacéz, auoit luy-mesme publié le benefice de cette trompeuse declaration, & pour en faire la premiere espreuve ouuert au Roy avec tant de confiance les portes de la ville. Aussi le masque leué en cet endroit, on n'a plus fait de doute de monstrier qu'on en veut a tout le general. Car aussi tost que le Roy a esté à Saumur on a eu nouuelles du desarmement qui s'est faict de tous ceux de la Religion par toutes les principale villes de la Normandie, ceux-la estoient ils aussi criminels, ou depuis la declaration ont-ils comis rebellion ou desobeissance? Qui plus est, comme le Roy estoit a Saumur, le sieur Arnaut est allé à S. Iehan d'Angely le iour de Samedy 15. du present, portant commandement à Monsieur le Duc de Rohan & a Monsieur de Soubize d'aller trouuer sa Majesté, comme desirât auoir leur aduis pour vn accommodement des affaires presentes. Cecy se faisoit à deux fins. L'une à fin que pour l'esperance de quelque iustice, les grands & les peuples de nostre Re

ligion fussent retenus comme ils ont esté iusques à present, tandis qu'on diligentoit de toutes parts contre nous les preparatifs de la guerre. L'autre principale & plus proche, pour courir la defiance ou le soupçon des troupes du Roy conduittes par Monsieur d'Auriac, qui le lendemain s'estant ietté dans les faux-bourgs de S. Iean avec trois mille cinq cens hommes, attaquâ la ville & fit effort iusques dedans les portes pour y entrer & la surprendre d'assaut s'il n'y eust trouué resistance. Cette ville estoit elle criminelle? la pouuoit elle estre que ces Seigneurs ne le fussent? Et ce pendant le Roy escrit à Monsieur le Duc de Rohan comme le recognoissant fidele & affectiônné à son seruice & gouuerneur & son Lieutenant en la Prouince de Poictou, ce qui ne se feroit pas à vn rebelle & desobeissant. Quel autre crime a donc commis cette ville pour estre inuestie & menacée de siege, & reduitte comme elle est à present, à attendre deuant ses murailles le canon du Roy & son armée qui s'auance en diligence pour l'assiéger. Quel crime a commis encore la ville de largeau autre place de sûreté, qui en mesme temps a esté inuestie, autre que le crime qu'on a iuré de ne nous pardonner pas? que la haine de nostre Religion dont ils ont coniuré la ruine? C'est ce que nous proposous deuant les yeux de tous les François, & non seulement d'eux, mais de tous les Chrestiens que nous appellons icy pour iuge de nostre innocence, & de la violente persecution que nous souffrons iniustement. Et encore que le précédēt recit veritable des procédures de nos ennemis contre nous, & des nostres enuers nostre Roy, donne assez à cognoistre la calomnie de l'accusation par laquelle ils nous publient rebelles & desobeissans, toutesfois pour ne laisser aucun ombrage qui puisse alier de nous la faueur du iugement equitable des gens de bien, leur compas-

sion, de nos misères : & leur secours, du besoin de nostre
 nostre defense necessaire & iuste : il nous est aisé de feire
 voir qu'il n'y a en nous ny soupçon ny apparence du
 crime de rebellion qu'ils nous imposent. La à Dieu ne
 plait qu'aucun estime que les plaintes, que la violence
 de l'oppression extorque de nous, regardent nostre
 Roy, auquel nous recognoissons & reuerons de tout
 nostre cœur l'image de Dieu icy bas. Mais reietans sur
 ceux qui abusent de ses affectiōs & de sa cōscience l'in-
 iustice dont nous nous plaignons, nous voulions dire
 quels eux-mesmes sont qui nous accusent, toute la
 France, qui gemit opprimée sous l'insupportable faix
 de leur tyrannie, resmoigneroit pour nous que nous
 ne le dirions point par recrimination ni par calomnie.
 Mais il suffira pour nostre innocence de nous purger
 de l'acculation. Or ils nous accusent d'estre rebelles &
 de.obeissans, & de heurter contre l'auctorité du Roy,
 Graces à Dieu la Religion que nous auons au cœur, &
 que nous auons déclaré par vne solennelle Confessiō
 presentee à nos Rois pour leur resmoigner avec la pu-
 reté du seruice que nous rendons à Dieu, nostre sincer-
 ité à leur obeissance, nous à ia long temps deschargez
 de ce blasme. Nous ne recognoissons aucune puissance
 en terre superieure à celle de nostre Roy. Nous n'a-
 uons point de serment à d'autre, Nous detestons toute
 doctrine qui enseigne que directement ou indire-
 ctement nous puissions estre desliez de celuy que nous
 auons iuré à son obeissance. Et à la profession sainte
 de ces enseignemens se rapportent aussi toutes les ac-
 tiōs & de nos peres & de nous. Ous'est-il trouué
 d'estre nous, qui ait trempé le cousteau detestable dās
 le sang de nos Rois, qui ait ioint son glaive à celuy de
 l'ennemy de la France pour deschirer ses entrailles?
 Ains apres tant de mortelles playes qu'elles en à receu

cydeuant, Dieu s'est-il pas serui des bras de nos pere
pour la releuer comme du tombeau? Et auioird'huy
qu'a la mesme coniuration se renouë, que ceux qui ont
juré haine mortelle à nostre Religion & par vne esgale
fureur se sont deuouez à la ruine & destruction de tous
les Estats de la Chrestienté, & particulièrement de cer
te Monarchie, tenans le cœur & les volonte de Roy
comme en leurs mains, dependantes des suggestion
qu'ils font à sa conscience, l'induissent à mettre son Estat
en hazard pour nous perdre: nous osons dire que le
temps & l'experience luy feront encore recognoistre
qu'il n'a rien de plus ferme en son Royaume pour l'ap
puy de la Couronne que nostre fidelité. Et certaine
ment il n'est rien de plus exposé aux veus de tous ceux
qui nous considerent, que de recognoistre que les inte
rests de nostre conseruation sont inseparablement at
tachez au repos & à la paix de cette Couronne, & à l'af
fermissement de l'auctorité de nostre Prince. Il est in
dubitable que selon les moyens humains dont Dieu
se sert pour l'aduancement de son œuvre, la conserua
tion & accroissement de nostre Religion en ce Royau
me, dependant de la liberté & teureté des Edicts sous
lequels nous viuons; l'entretien des Edicts, de l'auto
rité absolue du Roy. Telsin en soit le regne heureux
de Henry le Grand, lequel comme Dieu eust esleué en
puissance & auctorité absolue plus qu'aucun des Roys de
la Chrestienté, aussi auôs nous veu lors sous la prospé
rité & grandeur de cette Monarchie nos Eglises fleurir
& se replanter & l'Euangile fructifier avec tant de suc
cez que nos ennemis en creuans de despit n'ont cessé
iusqu'à ce qu'ils ayent perfidement rai à la France ce
Roy si absolu. Et encore auioird'huy que pour pretexte
de nous courir sus & faire la guerre à nostre Religion
ils nous ont accusez de desobeissance, auons nous fait
autre

autre chose que de nous plaindre de l'autorité du Roy
 & de ses E dictz violez & d'en demander le restablis-
 sement? Et en cela y a il quelque ombrage de rebellion
 contre nostre Prince? Nous nous sommes assemblez
 pour luy demander iustice. Manquions nous de neces-
 sité ou de droict de le faire? Nous l'auons cy-dessus iu-
 stifié par l'estat de nos maux, & la qualité des promesses
 qu'on nous auoit donnees. Auons oustrepassé les loix
 de la plainte? Si refusez: nous auons recouru plusieurs
 fois, & plusieurs fois essayé de ietter nos tres-humbles
 requestes aux pieds de nostre Roy. He! qui peut trou-
 uer mauuais ou blasmer que nous facions enuers nostre
 Roy, image de Dieu en terre, ce que Dieu nous com-
 mande que nous facions vers luy? Et pour estre deme-
 urer ensemble plusieurs Deputez de toutes les Prouinces
 insistans de remporter de la grace du Roy l'effect de ses
 bonnes volonteiz enuers nous, est ce point vne maligne
 & iniurieuse chiquanerie, que pour autoriser vn desni
 de iustice, on nous accuse de donner ombrage à l'auto-
 rité du Roy? Et pour vn specieux exemple du refus
 qu'on nous fait, on allegue que les Estats apres la pre-
 sentation de leurs cahiers se retirent sans attendre la
 responce. Mais qu'auons nous de commun avec des
 Estats? toutes nos demandes sont particulieres. Nous
 ne demandons pas de faire des reglemens dans l'Estat,
 ou de nouvelles ordonnances, en quoy certainement
 l'autorité Monarchique seroit diminüee ou partagee, si
 les Estats y contribuoiient autrement que par leurs ad-
 uis. Mais tout ce que nous demandons est, que les
 Temples bruslez nous soient reparez, que l'exercice de
 nostre Religion empesché nous soit restably, que des
 villes ostees de nos mains en la garde desquels le Roy
 les a commises nous soient restituees. Que des Offi-
 ciers soient receus. Des enfans arrachez par force des

bras de leurs peres leurs soient rendus, & autres choses
semblables. En quoy l'autorité du Roy est elle blef-
see, s'il nous octroye sur le champ que iustice en soit
faicte? Si le particulier à qui l'iniure est faite en peut
iustement demander & attendre iustice du Roy, pour
quoy, si l'iniure est faite en haine du public, au publi-
c ne sera il pas permis le mesme? Ainsi y a il rien
de plus inique que de nous auoir accusez de rebellion
& de desobeissance pour nous estre plaints, & pour
auoir demandé iustice en cette sorte? rien de plus crue-
que de nous persecuter pour cette cause & nous faire
la guerre? Mais c'est assez pour recognoistre que les
pretextes recherchez par nos ennemis sont artifices ce-
lorez pour executer le dessein de long temps coniu-
ré de faire la guerre à nostre Religion, & de ietter la force &
confusion & en trouble.

Partant si on considere la iustice & la necessité pre-
sente que nous auons eu de recourir par nos plaintes
à la protection du Roy. Le droit & la permission que
nous auoit esté octroyee de nous rassembler pour
faire par des paroles si expresses & si solennelles. Le
manquement & la contrauention aux promesses inter-
uenues par la fraude de nos ennemis. Leur violence à nous
empescher l'accez vers la Maieité de nostre Prince, &
faire reietter toutes nos requestes. L'iniustice de leur ac-
cusation, & le crime calomnieux de rebellion qui
nous imposent. Si on considere la desloyauté de leur
procédure tandis qu'ils temporisent sur le refus de nous
faire iustice; pour nous oster trois villes à la fois en Viur-
rez, sur la fraude d'un traité, & par la rupture de la foy
publique. Enuahir tout le pays de Bearn contre une
stipulation si expresse & si pleinement accomplie de
notre part. Puis apres y commettre des actes d'hostilité
si sanglans & si inhumains. Et finalement si on con-

de vne perfidie si infame, que sous la couuerture d'une
 declaration autorisee du sacré nom du Roy, & verifiee
 dans tous les Parlemens de France, promettant seureté
 & liberté sous l'entretien des Edicts à tous ceux de la
 Religion qui demeureroient en obeissance, on se soit
 emparé de Saumur, où avec tant d'obeissance & de
 respect les portes ont esté ouuertes, sous des promesses
 expressees & particulieres, (outre la foy publique de la
 declaration) que rien n'y seroit innoué. Que par vne
 mesme fraude & trahison la ville de Iargeau au mesme
 temps a esté enuahie, celle de saint Iean attaquée, &
 maintenant en l'attente d'un siege. Tous ceux de la Re-
 ligion desarmez par toutes les principale villes de Nor-
 mandie pour les apprestier, hélas! à vne plus facile bou-
 cherie à laquelle ils sont exposez. Si on considere, di-
 sons-nous, toutes ces choses ensemble, nous ne doutons
 nullement qu'on ne reconnoisse que nous souffrons
 cette persecution pour iustice, & en haine de nostre Re-
 ligion, qu'une coniuration vniuerselle par toute l'Eui-
 rope menace aujourd'huy de destruire.

Pourtant estans reduits pour la liberté de nos con-
 sciences, & pour les affections de nostre patrie de cher-
 cher en nous mesmes, & vers les amis de nostre Reli-
 gion & de cet estat, vne iuste & necessaire defense.
 Nous nous adressons encore icy avec larmes à NOSTRE
 ROY, le supplians en toute humilité considerer &
 croire, que les vœux & plus ardens desirs, que nos es-
 pandons continuellement vers Dieu en nos prieres,
 sont pour la prosperité de sa personne, & de son Estat.
 Et qu'il se souuienne que nos peres, enseignés par leur
 Religion à la vraye obeissance deuë à leur Roy, ont a-
 bandonné le soin de leurs propres vies, pour rendre
 utiles & fructueux le soin & les labeurs de Henry le
 Grand, à reconquerir ce Royaume perfidement ven-

du, & mis en proye à ses ennemis, par les mesmes pre-
 textes de haine & de persecution contre nostre Reli-
 gion & nous. Et que par la il entende que nous sui-
 uans l'exemple de nos peres, heritiers de leurs affections,
 n'auons iamais abandonne le deuoir de nostre nais-
 sance, ni refusé la vraye obeissance & le prompt ser-
 uice que nostre Religion nous apprend à luy rendre. Et que
 pleust à Dieu, **SIRE** que vostre Maiesté poussée des
 vrayes interets de sa grandeur, & du mouuement na-
 turel de sa generosité, voulust pour l'affermissement
 de sa Couronne & dignité de son royaume, tourner
 les armes contre les ennemis de son Estat, & se seruir
 de nostre fidelité en la defense d'une telle cause. Nous
 ne craignons pas de dire de nous qu'en vne si glorieu-
 se emulation d'entre vos meilleurs subiects, la palme
 n'en demeureroit point à d'autres. Mais nous ditons
 maintenant & pleurons avec larmes de sang, & en a-
 mertume de sanglots qui deschirent nos entrailles, que
 les ennemis de vostre Couronne & de vostre personne
SIRE, vous ayans induit à employer vos armes con-
 tre nous, & à les tremper au sang de vos plus fideles
 subiects, veulent perdre & vostre Couronne & vostre
 personne tout ensemble. Ce sont vos vrais ennemis
 qui allument vostre haine contre nous, pour en em-
 braiser vostre Estat, & vous enseuelir en ses ruine. Qui
 ayans cruellement meurtri le plus grand roy du mon-
 de vostre glorieux Pere, par ce qu'il ne nous haïssoit
 pas, & que sa bonté & sa iustice nous protegeoit com-
 me ses fideles subiects: induisent auourd'huy vostre
 Maiesté à nous hair & à nous destruire, pour l'accabler
 elle mesme sous la cheute de cette Monarchie. Que si
 dans cet orage qu'ils ont desia excité & que nous ren-
 tons fondre sur nous, nous sommes contrains pour
 nostre propre defense, & conseruation de recourir aux

remedes naturels. Nous prestons, SIRE, deuant Dieu, deuant vous, & deuant tous les hommes, que nostre intention est de conseruer tousiours vostre auctorité, & le respect de vostre obeissance au milieu de nous, & que nous ferons tous nos efforts possibles pour sauuer de peril vostre personne & vostre Royaume. Veuillez le Tout puissant, qui est le Dieu de vengeance & de grace, & qui selon les decrets de son conseil, tantost à fait tomber son ire en diuers exemples d'horreur sur les restes des Rois & des peuples mutinez contre luy. Tantost à prelerué & conuertý à soy les plus animés contre son Eglise, vous donner, selon nos vœux, que garanti de tous dangers, vous puissiez recognoistre, la religion & la fidelité des personnes que vous haïssez maintenant sans le cognoistre.

Cependant nous appellons icy par nos tres-humbles applications tous les Rois Princes & Estats interessez en l'innocence de bons & fideles subiects opprimés, mais principalement obligez enuers Dieu à la defense de sa cause & de sa verité. Et les requerons appuyer de leur secours, & de leur assistance la foible defense que nous opposons par nécessité à tant de forces puissantes de nos ennemis, qui ayans choisi ce temps expres, apres qu'ils ont allumé le feu dans la plus part des Estats, d'où ils estiment que nous eussions peu attendre secours, pensent nous opprimer maintenant avec plus de facilité. Mais nostre confiance principale est au bras du Tout-puissant, qui renuerse les desseins des nations, & soufflé sur l'entreprise des peuples contre son Israël. Et puis que pour la gloire de son nom; nous sommes haïs, & que pour renuerse la verité il cherche nostre ruine, nous nous asseurons qu'il nous fera sentir la mesme deliurance que nos peres ont prouué de son secours, | que nous innoquons du pro-

fond de nos ames. Dieu ne te tien point coy, ne te ta
point, & ne te repose plus ô Dieu ! car Voicy tes ennemis
bruyent, & ceux qui te haïssent ont leuë la teste.

*C'est la declaration des Eglises reformees de France & Souue
raineté de Bearn par leurs Deputez assemblez à la Rochelle
Et pour vous.*

COMBORT,
BANAGE,
RODIL,
RIFFAVT,

President.
Adioinct.
Secretaire.
Secretaire.